



# **PRIMEIRU MINISTRU**

**DISKURSU  
SUA EXELÉNSIA PRIMEIRU-MINISTRU  
KAY RALA XANANA GUSMÃO NIAN  
IHA OKAZIAUN ABERTURA KONFERÉNSIA  
INTERNASIONAL JEOSIÉNSIAS**

Dili, 5 febreiru 2026



Palácio do Governo,  
Avenida Presidente Nicolau Lobato,  
Dili, Timor-Leste

Exelénsias,  
Distintus konvidadus  
Señoras no Señores,

Ksolok boot ida mai ha'u bele hato'o diskursu iha abertura Konferénsia Internasionál Jeosiénsias ida-ne'e no haree mós ema barak tebes mak envolve iha diskusaun kona-ba koñesimentu ho rekursus jeolójikus Timor-Leste nian, no mós kona-ba ita-nia país nia futuru ba longu prazu.

Maski Timor-Leste nasaun joven ida, maibé ita-nia país ne'e nia istória naruk tebetebes. Povu Timor nia moris iha relasaun metin ho nia rai no tasi.

Rai ho tasi halo parte husi forma oinsá ita-nia comunidade sira kompreende di'ak loos sira-nia fatin iha mundu, sira-nia responsabilidades ba malu ho sira-nia ligasaun ho ema sira ne'ebé moris uluk liu ita.

Prezensa husi ita-nia avó ho bei'ala sira iha ligasaun metin ho kompreensaun ne'e, ne'ebé kria ita-nia valores hanesan respeito, obrigasaun ho continuidade entre jersaun sira.

Ligasaun kle'an ho rai no tasi ne'e mak sustenta ita-nia povu durante tinan atus-ba-atus, liuhusi konflitus, explorasaun ho Rezisténsia iha tinan barak laran.

Durante tinan ruanulu-resin-haat, ita luta maka'as ba autodeterminasaun no ba soberania kona-ba ita-nia rai no tasi.

Halo ona tinan ruanulu-resin-haat Restaurasaun ita-nia independénsia.

Ita harii daudaun Estado ida ne'ebé moris hakmatek no demokrátiku, ho sosiedade ida ne'ebé nakloke no ukun tuir Estado-de-Direitu.

Ita nia mata-dalan mak Planu Estratéjiku Dezenvolvimentu ba longu prazu, husi 2011 to'o 2030, ne'ebé fornese estrutura hodi harii nasaun ida ne'ebé próspera, bem-edukada no saudável.

Planu ne'e identifika setores estratéjikus tolu hodi harii ita-nia futuru: turizmu, agrikultura, petróleu no rekursus naturais.

Futuru ne'e tenke inklui garantia ita-nia soberania kona-ba ita-nia tasi, no mós ita-nia território.

Tanba ne'e mak ita hahú ona prosesu konsiliaun obrigatória ida, bazeia ba Konvensaun Nasoens Unidas kona-ba Direitu ba Tasi, atu asegura ita-nia fronteiras marítimas ho Austrália.

No tanba ne'e maka ita ohin mai iha-ne'e atu negocia ho ita-nia viziñu marítimu seluk ida, Indonésia, hodu halo kompletu delimitasaun ita-nia fronteiras marítimas.

Señoras no Señores,

Agora ita halo ona tinan ruanulu-resin-haat Restauraun Independénsia, ne'e mak ita-nia ligasaun ho rai dezde tempu bei'ala sira tenke completa ho koñesimentu sientífiku.

Soberania ita-nia nasaun nian la'ós de'it mai husi istória; sustenta mós ho koñesimentu, dixernimentu (ka klareza) no responsabilidade.

Koñesimentu ne'e mak permite ita kompreende di'ak liu ita-nia territóriu, ita-nia rekursus ho ita-nia oportunidades.

Durante tinan barak, desizaun sira kona-ba ita-nia territóriu ema seluk mak foti. Ita-nia independénsia permite ita determina rasik ita-nia futuro.

Maibé soberania significativa rekér koñesimentu ho kompreensaun kona-ba ita-nia rekursus, atu nune'e bele foti desizoens ba interesse nasaun nian ne'ebé di'ak liu.

Ida-ne'e mak ita halo ona ho projetu Greater Sunrise.

Dezenvolvimentu Greater Sunrise sei lori benefísius nasionais, inklui empregu, reseitas ba longu prazu ho estabesimentu baze industriál ida iha ita-nia kosta sul.

Tanba ne'e, mak pozisaun Governu sempre klara: gás naturál husi Greater Sunrise tenke prosesa iha rai-laran, iha Timor-Leste.

Ne'e esensiál la halimar ba dezvoltamentu nasional.

Hanesan ita konsege foti ona desizaun ida bazeia iha evidéncias ba projetu Greater Sunrise - ne'ebé utiliza mellór koñesimentu sientífiku, enjeñaria no ekonómiku nian - ita tenke dezvoltar mós kompreensaun hanesan ne'e kona-ba jeolojia ho rekursus naturais ba ita-nia territóriu tomak.

Tanba ne'e mak Institutu Geosiéncias Timor-Leste importante tebetebes ba ita-nia país.

Nia mak responsável atu promove no realiza investigasaun jeolójika no dezenvolve koñesimentu sientífiku ba servisu Estadu no povu timor tomak nian.

Laiha koñesimentu mak sei laiha verdadeira soberania kona-ba ita-nia rekursus naturais.

Ita mós hatene katak, iha nia mundu interligadu ida-ne'e, ita labele halo buat hotu mesamesak de'it. Kooperasaun internasionál hanesan nesesidade estratéjika ida ba ita-nia país.

Kolaborasaun ho servisu jeolójikus, nasionais, universidades no sentrus investigasaun internasionais permite ita aselera aprendizajen, partilla experiéncias, adota boas práticas no evita errus ne'ebé komete ona iha kontekstu sira seluk.

Konferénsia internasionál Jeosiéncias nian ne'e hanesan ezemplu konkretu ida kona-ba kooperasaun ne'e.

Eventu ne'e halibur instituisoens husi mundu luzófonu, husi rejiaun Ázia-Pasífiku no husi fatin sira seluk, iha diálogu abertu kona-ba papél jeosiéncia iha konstrusaun Estadu, iha kreximentu ekonómiku no iha dezenvolvimentu sustentável.

Señoras no Señores,

Siénsia tenke serve ba ema hotu-hotu. Koñesimentu tenke tradúz iha desizaun sira ne'ebé bele hadi'a ita-nia moris, proteje comunidades no kria empregue.

Govern empenhadu ona atu kontinua investe iha siénsia.

Ita hakarak joven timoroan sira bele formadus iha jeosiéncias, enjeñaria, ambiente ho enerjia. Ita hakarak mós instituisoens públikas profisionais ne'ebé bele halo planu, regula no decide ho baze iha koñesimentu.

Só nune'e mak ita-nia rekursus naturais bele sai hanesan baze ba ita hotu-hotu nia prosperidade ho futuru ida ne'ebé seguru liu.

Señoras no Señores,

Timor-Leste empenhadu ona iha dalan dezenvolvimentu inkluzivu no sustentável, ne'ebé bazeia iha koñesimentu, hametin ho kooperasaun no foka iha prioridades nasionais ba longu prazu.

Konferénsia ne'e oferese oportunidade importante ida atu halo reflesaun, atu troka koñesimentu no halo parserias ne'ebé dura kleur liu enkontru ida-ne'e.

Eskoilla sira ne'ebé ita halo kona-ba ita-nia rai ho ita-nia tasi sira mak sei harii-metin ita-nia país.

Ha'u fiar katak Konferénsia ne'e sei tulun orienta ita-nia eskoillas no kontribui ba ita-nia nasaun nia futuru iha tinan tunan ruanulu-resin-haat nia laran no nafatin ba oin.

Obrigadu barak.